

Gvangjsih Minzcuz Bau

ganbbau: CN45-0036 B.2015 Nd.3 Ng.25 liggaueq ietfeih nienz ndwenngelil coloeq

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3166期

Ningzmingz:

Fazgvanh Aeu Vahcuengh Banh'anq Yauliz Sang

宁明:法官用壮语开庭提高办案效率

Geij ngoenz gonq, Ningzmingz Yen Yinzminz Fazyen boux fazgvanh Bi Denhbingz aeu Vahcuengh saemjleix aen anq lizvwnh gvendaengz Cinz moux gauq Vangz moux. Ciuq cam rox, langhnaeuz aeu Vahgun saemj aen anq neix couh deng aeu aen buenq cung cij saemj sat, Bi Denhbingz boux fazgvanh neix aeu Vahcuengh saemjleix le cij yungh 40 faencung.

Cinz moux(mehmbwk) caeuq Vangz moux youq 2008 nienz 2 nyied daengz Ningzmingz Yen Minzcwnggiz dwnghgi gietvaen, daengzlaeng aenvih songde doxceng, Cinz moux doenggvaq mbaw sawgauq ndeu

gauq daengz fazyen iugouz caeuq Vangz moux lizvwnh. Youq guh fazdingz saemjleix seizde, aenvih Cinz moux mbouj rox gangj Vahgun, Bi Denhbingz couh aeu Vahcuengh daeuj saemjleix aen anq neix.

Ciuq cam rox, Ningzmingz Yen vunz Bouxcuengh lai, Vahcuengh dwg cungj vah haujai vunz gangj de, bingzciengz vunz lai aeu Vahcuengh daeuj doxgyau. Vihliux hawj vunz lai guh saeh gauq lai fuengbienh, daezsang yauliz banh'anq, Ningzmingz Yen Yinzminz Fazyen heuh dingz lai gangingj hag Vahcuengh dangdieg; youq laeb'anq, haeuj mbanj soengq saw, hai dingz,

diuzgaij, buenqanq seizde, dingz lai gangingj rox aeu Vahcuengh caeuq vunz dangdieg doxgyau.

Ningzmingz Yen Yinzminz Fazyen aeueiq hawj vunz lai saujsu minzcuz hengz gij gienzleix gauq-saeh, youq banh'anq seizde, aen fazyen neix doengzeiq vunz saujsu minzcuz aeu vah saw minzcuz bae gauq, handap vunz gauq, gangj leixyouz, lwnh yigen. Aeu Vahcuengh banh'anq, hawj vunz lai caeuq ganbu engqgya nemgyawj, hawj vunz lai gauqsaeh lai fuengbienh, daezsang le banh'anq yauliz, ndaej vunz lai haenhndei.

(Loz Yangzyinz/罗扬云)

SIUSIK DINJ

简讯

● Gyawj sam bi neix, Vanz-gyangh Mauznanzcuz Swciyen gungh roengz gij cienzngaenz fazcanj saujsu minzcuz 1516 fanh maenz, youq Daanh Yangh guh nem coih roensuij-niz 34 diuz, gungh 55 goengleix, fanh lai vunz souh'ik, gaijndei gij gihcuj sezsih aen yangh neix, gij cienzngaenz neix doiq aen yienh neix guh "daengx mbanj doihaeuj" fuzbinz gig mizyung.

(Veiz Vwnjbangh)

● Bi' gvaq, Lozcwngz Mulaujcuz Swciyen comzrengz dajcaux gij lijyouz gingjdenj miz minzcuz daegsaek, fazcanj swngghdai lijyouz, comz miz gij gingjsiengq swyenz, funghcingz Mulaujcuz, genswnh youqndwi, ngonzyawj suenmak, gvaq swngghoz nungzgyah daengj, daengx bi cieq hekyouz 36 fanh vunzbaez, souhaeuj 1.06 ik maenz.

(Mungz Cwnghswh)

● Bi' gvaq, Yungzsuij Myauzcuz Swciyen Minzcunghgiz miz diuz siusik ndeu ndaej Guekgia Minzveij Vangican yungh, 55 diuz siusik ndaej Swcigh Minzveij Vangj yungh, 26 bien gaujgen ndaej 《Gvangjsih Minzcuz Bau》yungh, 5 bien gaujgen ndaej 《Luijcouh Yizbau》yungh. Aen giz neix ndaej bingzguh aen cizdij senhcin guh hong siusik minzcuz.

(Fung Sauswh Veiz Yungz-cinh)

● Daj 2013 nienz daeuj, Fuconh Yauzcuz Swciyen Denhdangzlingj Linzcangz gaijguh ranzbungz, ndaw linzcangz gaijguh 102 aen ranzbungz ndaej guekgia coengh 204 fanh maenz, gag comz 888 fanh maenz, moix ranz hwnjguh menciz 60 daengz 144 bingzfanghmij. Doeng-gvaq gaijguh, mizyauq dwk hawj ndaw linzcangz neix doenghboux cizgungh gungzhoj de youq ranz onjndei.

(Cinz Yengiz)

● Bineix, Fangzcwngzgangj Si Gangjwz Gih Dahih Cin Sizgij Cunh oijndaem ndaej fungsou, yinx le haujai lauxbanj daeuj soucawx. Dangqnaj, daengx cunh ndaem oijndaem 250 moux, bingzyaenz moix moux sou ndaej 7 dun, gyaq soucawx moix goenggaen 1.5 daengz 1.6 maenz, moix moux daihgaiq souhaeuj fanh maenz, daengx mbanj gai oij ndaej souhaeuj 250 fanh maenz baedauq.

(Veiz Sauboh)

Yungzsuij: Mbanj Myauzcuz Duncuz Angq Gvaq "Ngeih Nyied Ngeih"

融水:苗家侗寨欢度“二月二”



3 nyied 21 hauh, liggaueq dwg ngeih nyied co' ngeih. Ngoenzde, Yungzsuij Myauzcuz Swciyen Duncouz Cin gawjhengz le daih-ngeihcib caet gaiq cietbauqva, geij cien boux vunz Myauzcuz, Duncuz daj gih raeuz nem Gveicouh daeuj giz-de, gyoengqde daenj ndangdaenj moq, comz youq giz ndeu, camgya roxnaeuz yawj hozdung boq aenvenz, caijdangz, maxdoxdik daengj, angq gvaq "ngeih nyied ngeih", maq-muengh bineix mbwn ndei, ndaem maz cungj lai sou.

(Lungz Linzei/龙林智 ingj)

Bineix Gih Raeuz Ciuaeu 130 Boux Hagseng Swhfan Hag Son Cuengh Gun Song Saw Vah

我区今年招收130名壮汉双语师范生

Bonjbauq siusik(gicej Dangz Lungz/唐龙) Geij ngoenz gonq, gicej daj Swcigh Gyauyuzdingh Vangican ndawde ndaej rox, Swcigh Gyauyuzdingh ciuq gij cingsaenz 《Aen Dunchih Gvendaengz Saedhengz Giva Dinghyiengq Vih Siujyoz

Beizyangj Lauxsae Cuengh Gun Song Saw Vah》nem gij cingzgvang bi' gvaq saedhengz de, bineix laeb-daeb dajsuenq ciuaeu doenghboux hagseng swhfan hag son Cuengh Gun song saw vah, mbouj aeu cienzhag, dingh ndei gyoengqde

bizyez liux dauq siujyoz dangdieg sonsaw, hag song bi, gauhcungh yozliz doxhwnj, ciuaeu 130 boux, youz Gvangjsih Swhfan Yozyen ciuq conhgoh cwngzsw beizyangj fangh'an bae beizyangj.